


TEZAU LITURGIC

4 MAI

ACATISTUL SF. MUCENIC FLORIAN DE LA LAURIACUM- LORCH-ENNS- AUSTRIA



MOSCOVA, 2000



Акафист мученику ФЛОРИАНУ

Кондак 1

Возбранный чудотворче и в скорбех скорый помощниче, страстотерпче святой Флориане, похвальная восписуем ти, святую память твою совершающе; ты же, яко имеяй велие дерзновение ко Господу, от всяких нас бед свободи, со умилением тебе зовущих: радуйся, Флориане, мучениче Христов преславный.

Икос 1

Ангельскаго мира Творец и всея твари Создатель яви тя, досточудне Флориане, Ангела земнаго и человека Небеснаго, егда светом Божественныя истины озарившеся, небоязненно потекл еси на подвиг мученический за веру Христову. Темже, вспоминая страдания твоя, вопием ти сице:

Радуйся, яко от языческаго нечестия к Богу Истинному обратился еси.

Радуйся, яко в купели Крещения естеством обновился еси.

Радуйся, Небеснаго отечества паче всего
взыскавый.

Радуйся, страдания многая за Христа
претерпевый.

Радуйся, Царя Небеснаго доблестный служителю.

Радуйся, с Ангельскими лики всеблаженный
небожителю.

Радуйся, Флориане, мучениче Христов
преславный.

Кондак 2

Видя гонения нечестивых на христианы, не
убоялся еси лютых мучений, Флориане, обаче,
яко истинный воин Христов, пред злочестивым
Аквилином на судище предстал еси,
христианином себе исповедуя и велегласно поя:
Аллилуиа.

Икос 2

Разум богопросвещен имея, святыи мучениче,
изумил еси всех мужеством души твоея,
пребывая бо духом выну на Небесех, смиренно
молил еси Господа благодатную помощь Его в
страданиях тебе низпослати. Темже, восхваляя
веру и упование твое, вопием таковая:

Радуйся, Церкви Христовы украшение.

Радуйся, мученического лика похвало.

Радуйся, Пресвятая Троицы верный поклонниче.

Радуйся, Истинного Бога небоязненный исповедниче.

Радуйся, Небеснаго Царствия наследниче.

Радуйся, славы вечныя сопричастниче.

Радуйся, Флориане, мучениче Христов преславный.

Кондак 3

Сила Божия воистину укрепляше тя, Флориане добропобедне, не токмо бо мучителя твоего, но и врага рода человеческого терпением твоим победил еси и, мужество во страданиях явив, во обители Небесныя невозбранно возшел еси, идеже поеши со Ангелы песнь: Аллилуиа.

Икос 3

Имеяй радость вечную на Небесех, блаженне Флориане, и нас, живущих на земли, не оставляеши и милостиво с Горних высот на всех призираеши. Темже, на молитвенную помощь

твою уповающе, со умилением сердечным тебе
вопием:

Радуйся, непобедимый воине Христов.

Радуйся, Божий избранниче.

Радуйся, бедствующим скорый предстателю.

Радуйся, за обидимых неустанный ходатаю.

Радуйся, от тяжких искушений нас свободядай.

Радуйся, в скорбех и напастех нам помогай.

Радуйся, Флориане, мучениче Христов
преславный.

Кондак 4

Бурю нечестия разгоняя, посреде капища
языческаго стал еси, Флориане, и дерзновенно
веру во Христа Иисуса исповедуя,
богомерзскому идолу не поклонился еси,
укрепляющему тя Истинному Богу поя:
Аллилуиа.

Икос 4

Слышаще о подвизе исповедания твоего и о
многих мучениях, яже за Христа приял еси,
страстотерпче, прославляем дивное терпение
твое и приносим ти похвалы сия:

Радуйся, сладкогласный Христов проповедниче.

Радуйся, обителей райских блаженный наследниче.

Радуйся, веры православныя столпе непоколебимый.

Радуйся, христиан благочестивых щите несокрушимый.

Радуйся, чудес сокровище неоскудеваемое.

Радуйся, исцелений источниче неисчерпаемый.

Радуйся, Флориане, мучениче Христов преславный.

Кондак 5

Боготечней звезде подобен был еси, мучениче преславне, приводяй всех к познанию Истиннаго Бога, Емуже, в страданиях ты укрепившему, поеси ныне: Аллилуиа.

Икос 5

Видевше ты людие, мучениче Флориане, с каменем жерновным на выи безбоязненно веру Христову исповедающа, дивляхуся зело, яко не страшат ты страдания и смерть лютая; мучители же твои, духом злобы ослепленнии, в реку ты

низринуша, егда Господеви твоему молитвы возносил еси. Мы же вопием ти:

Радуйся, страсотерпче предивный, мужественно за Христа пострадавый.

Радуйся, мучениче славный, жизни своея за Создателя твоего не пощадивый.

Радуйся, все упование свое на Господа возложивый.

Радуйся, верен Тому до конечнаго издыхания своего пребывый.

Радуйся, в преддверии Царства Небеснаго радость велию предвкусивый.

Радуйся, венец мученический от Владыки Христа приявый.

Радуйся, Флориане, мучениче Христов преславный.

Кондак 6

Проповедником истинныя веры во Христа явился еси пред мучители твоими, победоносне Флориане, не убоялся бо еси убивающих тело, души же не могущих убити, но всего себе в руце Божия предав, ныне во славе Небесней поеши со Ангелы: Аллилуиа.

Икос 6

Возсиял еси праведным житием твоим и мученическим подвигом, Флориане, яко светило лучезарное, светящее всем жаждущим спасения и жизни вечныя со Христом. Научи и нас мужественно и терпеливо переносити скорби в житии нашем многомятежном, вопиющих тебе сице:

Радуйся, яко верныя во благочестии укрепляеши.

Радуйся, яко пребывати умом в Бозе нас научаеши.

Радуйся, Христовым страstem в телеси твоём приобщивыйся.

Радуйся, никкими прещениями от Господа твоего не отступивый.

Радуйся, яко кровию мученическою одеяние души твоея убелил еси.

Радуйся, яко от руки Господни блага нетленные восприял еси.

Радуйся, Флориане, мучениче Христов преславный.

Кондак 7

Хотяще угодити Богови, прославляющему святых Своя, благочестивая вдова Валерия притекши на место, идеже лежаше многострадальное тело твое, Флориане, взя его оттуду и погребению предаде, поя о тебе Господеви: Аллилуиа.

Икос 7

Новое чудо и милость Божия явися: на пути бо к месту погребения тела святого Флориана изведе Господь из недр земли источник воды целебный, да вси с верою к нему притекающие здравие душ и телес обретают и восхваляют угодника Божия пении сими:

Радуйся, Церкви преславный светильниче.

Радуйся, молитвы благовонное кадило.

Радуйся, христианских добродетелей сокровище многоценное.

Радуйся, верных пред Богом предстательство непостыдное.

Радуйся, заповедей Божиих верный блюстителю.

Радуйся, истины Христовы твердый ревнителю.

Радуйся, Флориане, мучениче Христов преславный.

Кондак 8

Странная и дивная чудеса и исцеления яви Всемогущий Бог на месте погребения твоего, преславный мучениче Флориане; сего ради притекают к тебе людие, скорбьми обремененнии, ходатайства твоего ко Господу просяще и вопиюще о тебе песнь: Аллилуиа.

Икос 8

Весь в Бозе быв, страстотерпче Христов, о Бозе чудеса многия совершаеши и по смерти твоей; не остави убо и нас благодатною помощию твоею, да благодарно из глубины сердечныя тебе вопием:

Радуйся, яко помощь твою верным скоро являеши.

Радуйся, яко от потопа и бурь нас покрываеши.

Радуйся, домов наших от огненнаго запаления охранителю.

Радуйся, сущим в напастех милостивый предстателю.

Радуйся, яко в нуждах к Богови притекати нас научаеши.

Радуйся, яко за вся благодарити Его нас наставляеши.

Радуйся, Флориане, мучениче Христов преславный.

Кондак 9

Всякия беды и напасти помози нам превозмогати молитвами твоими, мучениче святой Флориане, да, укрепляясь в вере и уповании на Бога, возможем неуклонно по пути спасительному к Горнему отечеству шествовати, радостно поя: Аллилуиа.

Икос 9

Ветийство наше не довлеет прославити по достоянию житие и вся подвиги твоя, Флориане, обаче милостиво приими от нас малыя похвалы сия, со умилением тебе воспеваемыя:

Радуйся, теплый за нас пред Богом ходатаю.

Радуйся, всех призывающих тя скорый помощниче.

Радуйся, подвиг мученический добре совершивый.

Радуйся, со святыми на Небесех наследие
улучивый.

Радуйся, яко мощами твоими чудеса содеваеши.

Радуйся, яко всякия недуги душевныя и
телесныя врачуеши.

Радуйся, Флориане, мучениче Христов
преславный.

Кондак 10

Спастися взыскующим Царствия Небеснаго
вспомоществуя, верный путеводитель и
наставник явился еси, Флориане, темже и
научаеши нас во благодушии и терпении всякия
скорби и напасти переносити и выну Бога за вся
благодарити, поя Ему: Аллилуиа.

Икос 10

Стена неборимая и верное заступление ты еси,
страстотерпче Флориане, всем усердно к тебе
притекающим и пред иконою твоею умильно
молящимся. Сего ради ублажаем тя сиче:

Радуйся, веры Христовы не боязненный
проповедниче.

Радуйся, христианскаго жития мудрый
наставниче.

Радуйся, миром и любовью нас ограждай.

Радуйся, благочестию нас научай.

Радуйся, рабов Божиих присное поможение.

Радуйся, враждующих на христианы скорое низложение.

Радуйся, Флориане, мучениче Христов преславный.

Кондак 11

Пение со Ангелы Творцу приносяще, умоли Его, пречудне Флориане, подати нам благодатную помощь провождати добродетельное житие на земли и в будущем веце наследники Царствия Небеснаго быти, прославляющим милость Его и вопиющим: Аллилуиа.

Икос 11

Светоприемный светильник истиннаго света сущим на земли являешия, богоблаженне Флориане, просвещаяй верных и к разуму Божественному наставляяй взывающих ти таковая:

Радуйся, яко в подвизе исповедания веры нас укрепляеши.

Радуйся, яко терпению в скорбех нас научаеши.

Радуйся, православных христиан изрядный поборниче.

Радуйся, от Господа нам дарованный заступниче.

Радуйся, страждущих благое утешение.

Радуйся, обидящих грозное вразумление.

Радуйся, Флориане, мучениче Христов преславный.

Кондак 12

Благодать Божественную испроси нам, страстотерпче Христов, буди нам во всем благий помощник и к покаянию верный наставник, научая нас нелицемерно Богу служитьи и воспевати Ему: Аллилуиа.

Икос 12

Поюще великия подвиги твоя, мучениче Христов Флориане, прославляем дивное житие твое, славим мученическую кончину твою, похваляем благолепие благодати чудес, яже от честных икон и святых мощей твоих бывають, поюще ти таковая:

Радуйся, во святем Крещении Богу Отцу
усыновленный.

Радуйся, Христом Богом возлюбленный.

Радуйся, Духом Святым просвещенный.

Радуйся, со святыми мученики на Небесех
водворенный.

Радуйся, чудесы твоими нас утешаяй.

Радуйся, в час смертный чтущих тя не
оставляй.

Радуйся, Флориане, мучениче Христов
преславный.

Кондак 13

О всеблаженный мучениче Флориане, прими
сие малое моление наше, от сердец
сокрушенных тебе возносимое, и умоли Христа
Бога простити нам вся прегрешения наша и, по
милости Своей, избавити нас вечныя муки,
даровати же нам жизнь вечную, да выну
пребываем с Ним на Небесех и поем Ему со
всеми святыми песнь: Аллилуиа.

(Этот кондак читается трижды, затем икос 1 и
кондак 1)

Молитва

О святыи угодниче Божий, мучениче Флориане! Подвигом добрым подвизався на земли, восприял еси на Небесех венец правды, егоже уготовал естъ Господь всем любящим Его. Темже взирающе на святыи твой образ, радуемся о преславнем скончании жительства твоего и чтим святую память твою. Ты же, предстоя Престолу Божию, приими моления наша и ко Всемилостивому Богу принеси, о еже избавити нас от всякаго зла, наипаче же от огня, потопа и бурных ветров, даровати же нам здравие душевное и телесное, земли плодородие, благорастворение воздухон и во всем всякое изобилие. И тако избавльшеся тобою от скорбей, болезней, бед и напастей, благочестно и праведно поживем в нынешнем веце и сподобимся предстательством твоим, аще и недостойни есмы, видети благая на земли живых, славяще Единого во святых Своих славимаго Бога, Отца и Сына и Святаго Духа, ныне и во веки веков. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**